

alveo per Scaldia Insulae littora violento vastoque gurgite in Oceanum devolvitur. Ceterum flumen hoc æstum Oceani reciprocantis sentit Gandavum usque, ab ostio Milliaribus (hisce tamen adnumeratis ejus anfractibus) plus quam xxx. Subeuntque flumen hoc Acipenser, Salmones, Trutæ, Lampetrae ingentes, Rhombi, Congri, Aloæ, Cuculi, Mugiles, Cammari, Soleæ, Locustæ admirabiles, Sardæ, alique permulti Pisces delicatissimi qui ex Mari adverso amne in Scaldim penetrant, ibique pascuntur & ova pariunt, quod ejus aqua ipsis ad id aptissima sit. Atque hinc duobus aut tribus mensibus, inter ver & astatem præter majores Pisces, tantus numerus pisciculorum minorum, vix natorum, capitur, ut incredibilis inde hominum multitudo victitet. Flumen hoc quoque plurimi Canes Marini, & Turfiones ingrediuntur, quæ duo genera Piscium ex eorum numero sunt, quæ non ova, sed membris propriis fœtus jam formatos & perfectos pariunt. Canes Marini suos terragignunt, & suis uberibus, dum ad mediocrem magnitudinem pervenerint, lactant. Præterea Fluvius hic ex se, nullo Maris adminiculo, varia toto anno Piscium producit genera, quorum hæc sunt præcipua: Lucii, Barbi, Tincæ, Cyprini nobilissimi & commune pondus excedentes, ut xx sæpe librarum reperiuntur, Gobiones, & alii Pisces permulti majores & minores. Anguilla variæ, varia Cammarorum genera, & in Fluminis Ostio Ostrea nonnulla, quæ tamen eo ex Mari subeunt. Itaque Fluvius hic subsidio Maris, Piscium multitudine & varietate nulli, non modo Gallia, sed nec totius Europæ Flumini cedit. *Aa* prope Teroanam oritur, & in Cæciam vergens, Fanum S. Audomari perlabitur, ac Grevelingam delatus (prope quam anno CIO IO LII inter Burgundos & Gallos celebris illa pugna commissa est) in Britannicum Mare se exonerat. *Lisa* vulgo *de Leye*, in Artesia oritur, in Pago Lisburgo (*Lisbourg*), qui hinc nomen obtinet, prope Teroanam: & *Ariam*, Armenteriam, Wervicum & Meninas (*Meenen*) contemplatus, inde Cortracum medium secans, Gandavi cum aquis Scaldis commiscetur: Piscibus plurimis iisque optimis abundat. *Sambra* vulgo *Sambre*, *Sabis* Cæsari, in Hannonia prope Pagum Novionem (*Novion*) nascitur, & in ventum Hellepontium conversus, lustratis Opidis, quæ vulgo, *Landrecy*, *Sassene*, *Barlaymont*, *Mabeuge*, *Merne*, & *Chasselle*, tandem Namurcum perlapsus in Mosam se exonerat, pisces delicatos subministrans. *Delain* in Brabantia, prope Pagum Tilam oritur, & versus Septentrionem tendens Wayeram petit: deinde Lovanium permeat tribus inde Milliaribus dissitum; & cursum istum tria circiter Milliaribus, postea in Occidentem flexus, multis Brachiis Mechliniam perlabitur, ac tandem quatuor Milliaribus a Rupelmonda, admodum auctus in Scaldim definit. *Sena* (*la Seine*) nomen, ut videtur, obtinuit, a Senonibus Britannia populis, cum in hæc Regionem ad vexandam Galliam venissent. Nascitur prope Opidum *Soignies* in Hannonia: & ad ventum Hellepontium vergens, Hallam petit: & Bruxellam perlapsus Vilvordam permeat: inde ad Cæciam flexus, dextra Mechliniam relinquit, ac paullo ulterius progressus in Delam se effundit. *Diza* apud Leodenses prope Opidulum *Per* oritur: & in Septentrionem conversus Eindovam interluit: inde pristinum cursum servans Silvam Ducis petit, infra quam in Mosam evolvitur. *Demera*, prope Tungros in Leodienfi quoque Diocesi, scaturit, & in Occidentem versus Bilsenum, inde Hafsiletum (*Hasselt*) & Diestum interluit,